

# ODOEJE LIWAKATE PEDRO

Pedro libakedi me nomiigomigi nigijo negenidite Jesus ijaagijo nioxoa anodita André modiotibece. (Awiniteloco Mateus 4.18). Pedro idioka limedi me yelogo, icaa ina daga lacilo nigijo anodiotibece Jesus, pida dinetetema Jesus nigijo nogoniwilo. Nigijo Jesus nogopitedibigimece ditibigimedi, odaa Liwigo Aneotedogoji ja dinikateloco me iige lewiga Pedro, odaa ja diniigi lakataga. Liwigo Aneotedogoji yajigota Pedro mabo laalegena codaa me yajigota lixakedi me dotaga nigina me yalagatalo Jesus lodoe lacilodi judeutedi. (Awiniteloco Atos 2; 4.8). Pedro idí nagadi liwakate didikotibige nigijo anonakato Goniotagodi anilaagitibece leegodi moiatetibece. (Awiniteloco 1.1).

Pedro idí nagadi liwakate meo loniciwaga nigina anonakato Goniotagodi me leeditibige me ninitibigiwaji nigina minoa ane dakaketema, leegodi Aneotedogoji idi me yotetetedogodomi gonagajegi ane daga da. Nigidiaagidi Pedro ja niladeetiniwace me leeditibige moyiwagadi lajoinaganegeco nigina anoiige niigotedi, codaa aagaga yajoi niginoa niotaka moyiwagadi niotagododi me daga notaganagateloco, leegodi Cristo adotagatedibece naga dawikodedogodomi. Pedro najoitiniwace wadonadi me leeditibige me dineemitetiwage. Codaa aagaga yalagata me dagaxa mele me jawikodeega nigina me jaoga anele, aliciagi nigina me jawikodeega leegodi me jaoga ane beyagi. Leeditibige me digica me jaogate niwicidi noenataka, pida ele miniokiniwateda Aneotedogoji me jogeegatalo. Pedro eo leemidi maleeginoa eletidi nawikodico anenagi, pida leeditibige me ninitibigiwaji. Pedro didikotibige lacilodi anoiige lapoli loigi Goniotagodi me dowediteloco loigi Cristo, codaa me dinilionigatiditibigiwaji, codaa me dinoweditibigiwaji, leegodi Godaxakawa idioka limedi me doletibige me yaagadi eliwagatakanegegi.

## **Pedro yecoeditibige nigijo noiigi Aneotedogoji ane iolatedicoace me loigi**

**1** <sup>1</sup>Ee Pedro, ee liigexegi Jesus Cristo. Jiwakateetibige nagadi iwakate notaganagaxi miditaga nigidi noiigi Aneotedogoji ane iolatedicoace, ane ialetibigiwaji midiwataga eletidi iigotedi, odaa jogoyaladi epaa nipodaga. Odaa jigilaagiteloco midiwataga nipodaga Ponto, Galácia, Capadócia, Ásia aniaa Bitúnia. Odaa jigidiaagi makaamitiwaji iomigigipi. <sup>2</sup>Anigicatibige daganiitiniwacetiwaji, Aneotedogoji ane Godiodi, ja gadiolaatedicoacetiwaji leegodi jigidaa ane yemaa. Odaa Liwigo Aneotedogoji ja gadiomagatiticoacetiwaji makaami epoka nepiliditeda, codaa eotedibige me iwagatitiwaji Jesus Cristo ane nadoogodi epaa lawodi me gadapitagatitetema inoatawece ane gabeyacegeco.

Jemaa Aneotedogoji mepaanaga dagaxa meletedagadomitiwaji, codaa meote gadaalegenali mele.

**Anodaagee me inibeoonagatibigege nigica gonogeedi  
Aneotedogoji ane najigotedogowa**

<sup>3</sup>Jiwenigidenaga Aneotedogoji ane Niotagodi codaa me Eliodi Goniotagodi Jesus Cristo. Leegodi dagaxa me godiwikode, odaa jegeote gela godewiga, codaa eote me inibeoonagatege midioka limesi me godewiga leegodi Jesus Cristo me yewigatace nigijo me yeleo. <sup>4</sup>Codaa eote me inibeoonagatege nigica anicota me yajigotediogi lionigipi. Najigotedogowa nigina gonogeedi ane daga beyagi, codaa agica gaantokaagidi libeyacagajegi, otegeaxagaga lapioyagajegi, codaa agalee ma, ane yotetetedogodomitiwaji digoida ditibigimedi. <sup>5</sup>Leegodi manakatonitiwaji, odaa Aneotedogoji doweditedagalocotiwaji. Nigina me doweditedagalocotiwaji, ibake epaa nimawenegegi me ikeetediogi inatawece oko meote gadewiga ane digica liniogo digoida miniwataga. Icota meote nigida anejitagawa nigica nigowidijegi noko.

<sup>6</sup>Leegodi nigica gonogeedi anejita, odaa eliodi maniniitibecetiwaji. Pida natigidawaanigi, ejime leeditibige makaami agecagalodipitetiwaji, leegodi owidi nawikodico anetigadicini adiniciamico. <sup>7</sup>Niginoo nawikodico enagi moikee mewi manakatonni Goniotagodi. Macataga oolo me dinelio, pida oyokoletioi noledi nagana oolo monoga icoatawece lapioyagajetedi, owotibige me yapidi nagana oolo. Odaa jigidaagodigota moibinie nagana oolo. Odaa niginao gadawikodico liciagi nigijo noledi ane ibinie nagana oolo. Gatiwagatakanegegi dagaxa me diniwaloe caticedi nagana oolo, odaa Aneotedogoji ika niginao gadawikodico moici gatiwagatakanegegi me noga nigina ane digica jaoga, odaa eo mepaanaga yoniciwadi gatiwagatakanegegi. Odaa nige dopitedijo Jesus Cristo, Aneotedogoji dogetetedagawa, codaa gadiwenigidenitiwaji, codaa eote gaboonaagadi me nelegi leegodi meliodi gatiwagatakanegegi. <sup>8</sup>Idaagidata me digicoateda manati Goniotagodi, pida emaani. Idaagidata me digicoateda manati nigina natigide, pida anakatonni, odaa eliodi maniniitibecetiwaji, codaa otegeaxagaga akati melogoti anodaagee gadinikegi. <sup>9</sup>Eliodi maniniitibecetiwaji leegodi jigidaa adinanalitigi me gadewikitema Aneotedogoji leegodi manakatonni.

<sup>10</sup>Nigijo anoyelogoditedibece lowooko Aneotedogoji nigijo jotigide domegeliodi modoletibige moyowoogodi Aneotedogoji anodaagigote meote nigina oko me newigatace. Oyelogoditedibece nigica Aneotedogoji me ikeetediogi anodaagigote me gadewikatitititiwaji, micataga nigina oko naga dinigaanyetece nogeedi. <sup>11</sup>Eledi domogoyemaa moyowoogodi nigica noko Aneotedogoji nige niige Cristo, codaa anodaageeteda me dinikee. Odaa Liwigo Cristo anini miditaga ikeetiogi Cristo me dawikode nige dinikatedini, odaa nigidiaagidi Aneotedogoji eliodi me iwenigide digoida ditibigimedi. <sup>12</sup>Aneotedogoji ikeetediogi nigijo anoyelogoditedibece lowooko nigijoa libaketedi me daga yaxawatiogi, pida nigijoa libaketedi бага gadaxawani akaamitiwaji anajipaatalo latematiko, nigijo nagajipaatalo nibodicetedi anele aneetece Cristo. Aneotedogoji niige Liwigo ane icogotibigimece ditibigimedi me yajigotediogi nimawenegegi nigijo

anoyatematitedibece nigijoa nibodicetedi anele. Codaa me nigicoa aanjotedi domogoyemaa moyowoogodi nigino a nibodicetedi anele ane yalagatalo Cristo.

**Aneotedogoji eniditedogowa miniokiniwateda me godewigatema**

<sup>13</sup>Enice adinenyagatitiwaji mele mowookoni codaa mowoogoti anewi. Adinowetitiwaji, codaa ajacagati gadakataga. Jinigikani me anibeonitegetiwaji Aneotedogoji micota me yajigotedagawa nigica ane dagaxa mele nigicota me dinikeetace Jesus Cristo. <sup>14</sup>Iwagati Aneotedogoji micataga nigina nionigi meyiwaagadi eliodi, odaa jinagaleegawiite nigijoa gadakataga ane beyagi anawii nigijo maleedogowoogotiteda Aneotedogoji. <sup>15</sup>Pida awii inokina ane yemaa Aneotedogoji, leegodi jiginiaageniditedagawatiwaji makaami nepilidi, codaa miniwa agica aneetege ane beyagi. <sup>16</sup>Igaataga Aneotedogoji lotaganagaxi ikee ane ligegi, nigina mee, “Awalacetge inoatawece ane beyagi, leegodi agica anejitege nigina ane beyagi.”

<sup>17</sup>Nigina motaganegeni Aneotedogoji, enitalo, “Eiodi”. Nigina me iwi anigotediogi inatawece oko, idokida anigotediogi, odaa yedia oninitecibeci leegodi nigicoa epaa loenataka. Odaa ele midioka limedi me eemiteetigi Aneotedogoji maleeginaagonitelocotiwaji nigina iigo micataga nigina oko iomigigipi. <sup>18</sup>Igaataga owoogotitiwaji nigijo loojedi Aneotedogoji ane yedia me gadikanitedicoace me oniteloco nigijoa lakataga jotigide gadaamipi, nigijo lewiga ane digica jaoga. Aneotedogoji ayatite oolo me yedia, otegeaxagaga beexo, nigino a nepaga aniaditema niwaló. <sup>19</sup>Pida nigijo negeote me gadiwokoni nigijo jotigide aneni me gadewiki, nigijo loojedi Aneotedogoji ane yedia, lawodi Cristo, ane dagaxa mida niwaló. Cristo liciagi nigina waxacoco ane digica libeyacagajegi codaa agaca lete anoibotalo Aneotedogoji. <sup>20</sup>Maleedigicatibige daga yoe Aneotedogoji nigina iigo, nagakaa iolatedice Cristo, odaa Aneotedogoji ikee Cristo digoina iigo nigino a nokododi, meote ane dagaxa meletagadomitiwaji. <sup>21</sup>Leegodi aneote Cristo, jaganakatonitetiwaji Aneotedogoji aneote Cristo me yewigatace nigijo moyeloadi, odaa yajigoteta owidi liwenigidenegeco, codaa me nimawenegegi. Joanigidaa leegodi manakatonitetiwaji Aneotedogoji, codaa manibeonitege meote me gadewikitace.

<sup>22</sup>Ja gadapititecetiwaji ijoatawece gabeyacegeco nigijo naga iwagati Aneotedogoji lotaga anewi, odaa jigidaa memaanitiwaji ganioxoadipi me dogokawii. Odaa jegepaanaga emaani oninitecibeci ganioxoadipi mele gadaalegena. <sup>23</sup>Igaataga nigida gadewiga gela aixomagatijo, aliciagi gadewiga anoyajigotagawa gadiododipi. Pida ida gadewiga gela leegodi Aneotedogoji lotaga, ane micataga nigina anida lewiga, odaa agica daga ma. <sup>24</sup>Nigidiwa Aneotedogoji lotaga modi,

“Inatawece nigina oko liciagi nigina nadegogo,  
 codaa libiniigi liciagi niale lawogo.  
 Igaataga nadegogo aleegi mina odaa ja yadilo,  
 odaa lawogo ja niwadetedini.

<sup>25</sup> Pida lotaga Goniotagodi Aneotedogoji bigidioka limedi midiwa.” Nigidiwa Aneotedogoji lotaga onadeegitagawatiwaji nigijo nogoyatematitagawatiwaji nibodicetedi anele anoyalagatalo Cristo.

**Aca wetiga ewike, idiaa loigi Aneotedogoji ane iolatedicoace me nepilidi**

**2** <sup>1</sup>Enice ikani mawii inoatawece ane beyagi, jinagalee awitaka, codaa jinogokaawii makaami ele dogoleetibige minaa leni oko, codaa jinaga anoceetema eledi, codaa jinigilikoni. <sup>2</sup>Nigina nigaanigawaanigi ane gela menitini dacaagetibece doletigi milibi, odaa awii liciagitiwaji, oleetibige Aneotedogoji lotaga ane jiciaceketege niginoa lotiidi eniodo. Nigidiwa notaga liciagi lotiidi eniodo ane digica lapioyagajegi, odaa jigidiaagowo me ili gatiwagatakanegegi, odaa ele mowoogoti niginoa niigaxinaganegeco gotiwagatakanegegi. Odaa jigidaa nige ili nigida gadewiga gela. <sup>3</sup>Leegodi jigiciniwaji codaa owoogoti Goniotagodi midioka limedi meotedogodomi anele.

<sup>4</sup>Goniotagodi liciagi nagana wetiga ewike. Goneleegiwadi oyaladiticogi we nagani wetiga micataga nigina naagogo moyaladi. Pida Aneotedogoji бага iolatedice Goniotagodi odaa yakadi me liciagi nagana wetiga ane dagaxa mida niwaló. <sup>5</sup>Nigina managitiwaji miniwataga Goniotagodi, Aneotedogoji eote nigida makaamitiwaji makaami noiigi ane micataga diimigi ane digeladetigi Liwigo Aneotedogoji. Nigida makaamitiwaji gadiciagi niginoa wetiadi ewikaga ane ibake Aneotedogoji me yoe diimigi. Odaa Aneotedogoji gadiomagatitedicetiwaji mabaatema miditaga loigi ane liciagi diimigi. Codaa ajicitalotiwaji Aneotedogoji nigicoa gaboona ane yemaa. Niginoa goboona niginoa godiwenigidenaganegeco ane icogotiwece godaalegena. Jakataga me jajicagatalo niginoa goboona leegodi nigijo Jesus Cristo aneotedogodomi, nigijo naga diniboote Aneotedogoji. <sup>6</sup>Igataga diniditeloce Aneotedogoji lotaganagaxi nigica Aneotedogoji ane ligegi, nigijo negee,

“Digawini!

Idejatice manitaga inigotaga Sião

nagani wetiga ane dagaxa mida

ane jaoga nigina me joenaga diimigi.

Nigina oko ane jiolatice liciagi nagana wetiga ane dagaxa mida niwaló.

(Ida niwaló leegodi

liciagi nigina lipodagaladi diimigi.)

Odaa nigina oko ane nakato Niginiwa ane jiolatice,

nigidi oko agica daga dininaale.”

<sup>7</sup>Nagani wetiga dagaxa me diniwaloetagadomi akaamitiwaji ananakatoni Goniotagodi. Pida Aneotedogoji lotaga yalagata nigina ane dogoyiwagaditeta Goniotagodi, nigijo negee,

“Nagani wetiga anoyokoleticogi we nigijo anoyoe diimigi, nagani wetiga ewi me dinanatigi me nagaca wetiga ane dagaxa me diniwaloe nigijo nogoyoe diimigi.”

<sup>8</sup>Maditaga Aneotedogoji lotaganagaxi aagaga diniditini ligegi, anee,  
 “Nagani wetiga eo mina oko ane nixipaga,  
 odaa jegenitiniwace.”

Nigina oko nixipaga nigina me dogodoletibige nigijo naigi anewi leegodi me dogoyiwagaditeda Aneotedogoji lotaga. Odaa nigina me nixipaga, Aneotedogoji liigenatakanegegi.

<sup>9</sup>Pida Aneotedogoji gadiolaatedicetiwaji makaami loigi, eote micataga dagakaami nisacerdotitedi inionigi-eliodi, akaami noiigi ane iolatedice miniokiniwateda modibatema, noiigi anepoka nebiteda. Aneotedogoji gadiolaatedicetiwaji melogotitedibece niginoa gobinico aneote, Jiginiaa eniditedagawa me ikani nexocaga codaa makaatiwece manitaga lokokena ane libiniena lodoe. <sup>10</sup>Nigijo jotigide agica dagakaami noiigi, pida nigina natigide jagakaamitiwaji noiigi, loigi Aneotedogoji. Nigijo jotigide agowoogotitiwaji Aneotedogoji meliodi me iwikode oko, pida nigina natigide Aneotedogoji ja ikeetedagawa meliodi me gadewikodenitetiwaji.

### **Leeditibige mejiwagataga nigina anida nagatetigi**

<sup>11</sup>Inioxoadipi yemaanigipi, nigida makaamitiwaji gadiciagi nigina iomigigipi codaa gadiciagi nigina anokenagi dalita nigina iigo. Odaa jipokotagawatiwaji me dagawii ane beyagi ane lemaanigi meo nigina godolaadi, igaataga niginoa golidagataka icaanigigota nigica godiwigo. <sup>12</sup>Leeditibige mele aneni me gadewiki maleegawaanitege nigina oko ane dogoyowoogoditeda Aneotedogoji, icaagica nige beyagi modotagatibigajaji. Odaa jigidaagee nigonadi niginoa gadoenataka anele, odaa jogoiwenigide Aneotedogoji nigica noko nigicota me iwi anigotediogi nigina oko leegodi niginoa loenataka anowote.

<sup>13</sup>Iwagatitiwaji inatawece nigina oko anida nagatetigi amaleegaga oiwenigide Goniotagodi. Codaa iwagatitiwaji inionigi-eliodi, anida nagatetigi caticedi niginoa eletidi anida nagatetigi. <sup>14</sup>Codaa iwagatitiwaji inatawece nigina anida nagatetigi ane liigexedi inionigi-eliodi moiloikatidi nigina oko ane lakapetegi lajoinaganegeco inionigi-eliodi. Inionigi-eliodi iige nigina ane niigenatakanaga moiwenigide nigina anoyiwagadi nigijoa lajoinaganegeco. <sup>15</sup>Igaataga Aneotedogoji yemaa me oeni nigina anele. Joanigidaa ganimawenegegi manibatooni nioladi nigina oko yetoledi anodi me lakapetegi gatiwagatakanegegi. <sup>16</sup>Ele me gadewiki micataga nigina oko Cristo ane nogatedicogi miditaga nigidi nibeyacegegi ane igoetiniwace. Pida jinogopilitaceloco mawii nigina ane dakapetege liigenatakanegeco Aneotedogoji leegodi agalee leeditibige moteteni liigenatakanegeco makati gela gadewiga. Pida idoka gadewikitema makaami liotagipi Aneotedogoji. <sup>17</sup>Eemiteetibige inatawece oko. Codaa leeditibige memaanitiwaji inatawece gonioxoadipi anonakato Goniotagodi. Ele menegegi eemiteetibigetiwaji Aneotedogoji codaa madoiitalo. Odaa eemiteetibige inionigi-eliodi.



(1 Pedro 2.25)

**Cristo ja nikeetedogowa ane leeditibige mejinaga nigina me jawikodeega**

<sup>18</sup>Nigida makaamitiwaji anakaami niotagipi, leeditibige midioka limedi me iwagati ganiotagododi, codaa me eemiteetigi. Jinaga eemiteetigi inokina nigina ganiotagododipi anele anyowo nigina aneletagadomitiwaji. Pida aagaga eemiteetigi nigina ganiotagododipi ane abeyacegegipi. <sup>19</sup>Igaataga Aneotedogoji ibinie nigina oko ane ixomagateetedijo lawikodico nigina me dawikode leegodi meo anele, codaa Aneotedogoji ibinie leegodi me yowoogodi nigica ane yemaa. <sup>20</sup>Nigini ganecalailegi nige gadalakeni leegodi mawii ane beyagi, idaagida me ixomagateenitedijo gadawikodico, agica ganogeeditalo Aneotedogoji. Nigawii nigina anele, pida ganecalailegi idokee meo mawikodee, codaa nige ixomagateenitedijo niginoa gadawikodico, odaa Aneotedogoji ja gadibinieni. <sup>21</sup>Igaataga Aneotedogoji eniditedagawatiwaji mawii nigica ane yemaa, odaa yemaa me ixomagateenitedijoti waji niginoa gadawikodico, nigina mawikodee leegodi mawii anele. Leegodi ijaagijoa Cristo dawikodedogodomi, odaa ja nikeetedogowa ane leeditibige mejinaga nigina me jawikodeega. Odaa leeditibige me jaoga liciagi Cristo anee nigijo me dawikode. <sup>22</sup>Agica daga dibatá, otegexaagaga diwitakateda.

<sup>23</sup>Nigijo oko nogoniweenigetedice Jesus, otegexaagaga ditinegeteda. Pida ikatetece Aneotedogoji mepaa iwi nigica loojedi nigijo anowotema ane beyagi

me nakapetegi nigijo oko, leegodi Aneotedogoji idioka limedi meote ane igenaga nigina me iwi anigote oko. <sup>24</sup>Aneotedogoji iloikatidi Cristo leegodi gobeyacegeco nigijo moyototedeloco lolaadi nicenaganagate moyeloadi. Odaa jigidaa aneotedogodomi, odaa ja micataga daga godeleo agalee jakataga me jaoga ane beyagi, codaa micataga daga godewigatace me jaoga nigica ane igenaga. Leegodi Cristo moyacilotidi, odaa yakadi me icilatidi codaa me godiwigo. <sup>25</sup>Nigijo jotigide gadiciagitiwaji niginoa waxacocoli ananiadi, pida nigina natigide jagadopilotalotiwaji me iwitece Nigijoa ane doweditedagaloco micataga nigina nowienogodi waxacocoli, odaa igoaditedagawatiwaji.

### Pedro yalagata wadonadi

**3** <sup>1</sup>Digo anodaagee niginoa niotaka moyiwagadi niginoa necalaixedi, odaa jigidagaga leeditibige me eni akaami iwaalepodi anakaami wadonadipi, iwagati gadodawadi. Odaa nigina nigani iwaalo anini lodawa analeedaga eyiwagaditeda Aneotedogoji lotaga, nigini goneleegiwa icota me nakato Goniotagodi nige nadi anodaagee lewiga lodawa meo inokina ane igenaga, odaa nagani iwaalo aleeditibige degeo ligegita nigini lodawa. <sup>2</sup>Odaa nigini goneleegiwa ja nadi lodawa meliodi me deemitetibige Aneotedogoji, codaa me nadi meo inokina ane igenaga. <sup>3</sup>Jinogoleetibige makaami libinienigipi inokina nigina manadini, digidioka limedi madinitecitibece, mabakeni ganadinagajetecidi, nigilagi oolo, ogoa domigetaga wetiga anida niwaló, ogoa domigetaga ina madinixomitinigilo nowoodi libinienaga ane dakake loojedi. <sup>4</sup>Pida oleetibigetiwaji makaami libinienigipi catiwedi gadaalegenali ane dogoyakadi monadi nigina oko, codaa adinelio. Oleetibige makaami okaagegipi, codaa jinigikanitiwaji gaantokaagini degeo gagecagalogo, odaa idioka limedi makaami libinienigipi catiwedi gadaalegenali. Aneotedogoji nadi nigida me dagaxa me diniwaloe caticedi oolo anaagana wetiga ane diniwaloe. <sup>5</sup>Igaataga nigijo jotigide jigidaagee me dinibinietibigiwaji catiwedi laalegenali nigijo iwaalepodi ane diniomagaditicoace modibatema iniokiniwateda Aneotedogoji, codaa onibeotibigege anele Aneotedogoji aneotetema. Odaa nigijoa lodawadi nigijo iwaalepodi idioka limedi moyakadi me libinienigipi leegodi moyiwagadi nigijoa lodawadi. <sup>6</sup>Sara jaganaagana leegodi idioka limedi meyiwigadi Abraão, odaa idokeyatigi “Iniwa-aagodi”. Natigide nigida makaamitiwaji iwaalepodi ja micataga dagakaami lionigipi Sara nigawii nigina anele, odaa jinigikani gaantokaagini degeo gagecagalogo, codaa degeo madoiitibecetiwaji.

<sup>7</sup>Akaamitiwaji, goneleegiwadi, anakaami wadonadi, jinagalatagani, codaa analakitibige mepaga dagaxa me gadoniciwati caticedi gadodawadi. Codaa eemiteetibige, igaataga Aneotedogoji eote akaamito gadodawadi me gadewikitace. Nigidaageni, odaa agica ane gadibeyacagati nigina motaganegeni Aneotedogoji.

**Nigica ane leeditibige mejinaga nigina me  
jawikodeega leegodi me jaoga anele**

<sup>8</sup>Niginoa owidijedi yotaga. Akaamitawecetiwaji ele midokida ane gadowoogo, codaa ele mowoogoti mawii aneletema oninitibeci oko. Ele memaanitiwaji ganioxoadipi, codaa ikeeni memaanitiwaji nigina ane nawikodeega. Oleetibige makaami libinienigipitema eledi oko, codaa adiniwikodenitibece lodoe eledi oko. <sup>9</sup>Nigica nigina oko aneo ane beyagitagadomi, jinaga domagawii ane beyagitema. Codaa jinaga ameni nigina oko ane gadame. Pida ipokitalo Aneotedogoji me ibinie nigini oko, igaataga Aneotedogoji eniditedagawa makaami lionigipi eotedibige me yakadi me gadibinienitetiwaji. <sup>10</sup>Igaataga Aneotedogoji lotaga yalagata nigini oko, mee,

“Nigina oko ane yemaa midioka limedi me ninitibece, codaa nige yemaa niginoa nokododi me yewiga meletema, leeditibige me yajacagadi nioladi me degeetece nigina ane beyagi, otegexaagaga inaale eledi oko.

<sup>11</sup>Codaa leeditibige manojicetema nigina ane beyagi, odaa ele meo anele.

Leeditibige me yaxawa nigina oko me daga dinotigimade, codaa ele midioka limedi me dinoniciwagadi me iletibigo me daga dinidelege.

<sup>12</sup>Igaataga Goniotagodi Aneotedogoji idioka limedi me niwite nigina ane igenagatibigiwaji me doweditedeloco.

Codaa idioka limedi me wajipatediogi nigina moyotaganega.

Pida Goniotagodi Aneotedogoji bigidioka limedi me lakapetedipi nigina anowo ane beyagi.”

<sup>13</sup>Nigadinoniciwagatitiwaji mawii nigina anele, agica aneo ane beyagitagadomitiwaji. <sup>14</sup>Pida nige awikodee nigina mawii ina ane igenaga, Aneotedogoji eote me aniniitibece. Odaa jinagadoiita nigina anowo mawikodee, otegexaagaga adinigecagalogotiti. <sup>15</sup>Pida ogeetetalo Goniotagodi Aneotedogoji catiwedi gadaalegenali, codaa oleetibige midioka limedi me gadigomi maninigoti okanicodaagica oko ane dipokotagawa melogoti ane leegodi manakatoni Aneotedogoji. <sup>16</sup>Nigina nigagiti, adiniwikodenitibece, codaa eemiteetibige Aneotedogoji. Oleetibige me digica gadoenatagi aneo madinilaanitibece, amanagawini nigina oko nige etigadameni, codaa me beyagi modotagatibige niginoa gadoenataka anele anawiite leegodi me iwitece Cristo, nigidi oko icota me niboligatibigiwaji leegodi niginoa epaa lotaga. <sup>17</sup>Igaataga Aneotedogoji nige yemaa mawikodee nigina mawii anele, pida dagaxa mele mawikodee nigina mawii anele, idigida agele mawikodee leegodi mawii ane beyagi.

<sup>18</sup>Igaataga ijaagijoa Cristo dawikode, codaa yeleo leegodi niginoa gobeyacegeco. Onijoteci me yeleo, mijoa igenaga odaa ja yeleotema nigina



ane daga igenagatibigiwaji eotibige me yakadi me godadeegite Aneotedogoji. Oyeloadi lolaadi Cristo, pida Liwigo Aneotedogoji eo me yewigatace. <sup>19</sup>Odaa Liwigo Cristo jigigo yatematitibece Aneotedogoji latematigo midiwataga liwicidi émagaga ane diniwilotibigiwaji. <sup>20</sup>Nigidiwa niwicidi, liwicidi nigijo oko ane dogoyiwagaditeda Aneotedogoji nigijo jotigide Noé malee yewiga. Aneotedogoji eliodi me dinatitediogi, odaa ailokatidi nigijoa nokododi Noé malee yoe nagajo etogo-nelegi. Pida onatecigijo oko iwoko nigijo Aneotedogoji naga niige aboogoninyogodi. Aneotedogoji ibake ninyogodi meote me yayotibece nagajo etogo, odaa jigidaagee oito oko newiga catiwedi nagajo etogo nigijo naga ocegaga ijotawece nigijo eledi oko. <sup>21</sup>Nigijo ninyogodi Aneotedogoji ane niige jiciaceketege nigina ninyogodi ane jibakenaga me jilegenaganaga ane ikee Aneotedogoji negeote me gadewikitacetiwaji, codaa ikee me gadiwokoni nigica noko nige iloikatidi nigina oko leegodi libeyacegeco. Nigina me jilegenaganaga, ajibakenaga nigina ninyogodi daga japitagatagece godolaadi liwile, pida jibakenaga ninyogodi me jikeenaga Aneotedogoji naga yapitagadi godaalegena, odaa agalee jeemiteegatece nigijo domaga goninyaagi catiwedi godaalegena. Joanigidaa leegodi me jakataga me jipokagatalo Aneotedogoji mele me dibatedogogi, codaa meote me godewigatace leegodi Jesus Cristo naga yewigatace nigijo me yeleo. <sup>22</sup>Nigijo naga yewigatace, Jesus Cristo jogopitedibigimece ditibigimedi, odaa etiniwa liwai libaagadi Aneotedogoji, miditaga limedi ane ikee mida nagatetigi. Odaa iige idiwatawece aanjotedi idiaagidiwa icoa niwicidi aninoa nagatetico codaa me nimawenegeco digoida ditibigimedi.

**Anodaagejinaga me godewiga aliciagi lewiga nigina  
ane dogoyowoogoditeda Aneotedogoji**

**4** <sup>1</sup>Digo mijoataga Cristo me dawikode nigijo nogoyeloadi, adinoniciwagatitiwaji mowookoni anodaageeteda me yowo nigijo lawikodigi. Igaataga nigina oko ane dawikode negepaa yeleo agaleegica aneetege nibeyacaga. <sup>2</sup>Enice, malee gadewiki digoina iigo, ikanitece Aneotedogoji me yajacagadi anenitiwaji me gadewiki, odaa jinigikani niginoa galidagatakanegeco daga yajacagadi nigina anawii. <sup>3</sup>Igaataga nigijo jotigide inoatawece nokododi awiitiwaji liciagi lakataga nigina ane dogoyowoogoditeda Aneotedogoji. Nigijo jotigide gadoomatewa okanicodaagica oko, codaa iwitece niginoa lidagataka gadolaaditiwaji ane beyagi, codaa idioka limedi me gademakitiwaji, codaa agadinajacagati miditaga naloogo, codaa dagaxa macipe mawanitege nigijo gadokaagetedipi. Awiitetetiwaji nigijoa nibeyacegeco nigijo malee ogeetetalo niwicidi noenataka. <sup>4</sup>Pida nigidi oko ane dogoyowoogoditeda Aneotedogoji, anijo me gadokaagetedipi nigijo jotigide, nigina natigide jogoyopo me dagadiaa awanitege mowo nigina ane beyagi anepagalee dagaxa mowo, adinajacagadi. Joanigidaa leegodi me beyagi modotagatibigagaji. <sup>5</sup>Pida icota modinilakidetege Aneotedogoji, igaataga ja igo me iwi anigotediogi nigina bagalee newiga, ijaagijo oko baanaga nigo. <sup>6</sup>Joanigidaa leegodi

Cristo magaga igo yatematitediogi nibodicetedi anele midiwataga liwicidi émagaga ane nigo nigijo maleedaga yeleteda Cristo. Aneotedogoji akaa iwi anigotediogi nigijo oko maleedaga nigo, odaa ja yaagadi loolatedi nigijo oko, anodaagee me yaagadi lolaadi inatawece oko leegodi libeyacegeco. Pida Cristo yatematitedibece nibodicetedi anele midiwataga nigijoa émagaga eotedibige nigijoa niwicidi moyakadi midioka limedi me newiga miniwataga Aneotedogoji, digo anodaageeteda Aneotedogoji midioka limedi me yewiga.

<sup>7</sup>Pida nigica noko Aneotedogoji nige yaagadi nigina iigo ja nipegi. Enice leeditibige majacagatiwaji gadwooko codaa me niginoa galidagataka, amaleegaga akati motaganegeni Aneotedogoji. <sup>8</sup>Nigica ane dagaxa mida ane jaoga nigina memaanitiwaji oninitebeci ganioxoadipi manitawece gadaalegena. Igaataga nigina oko ane yemaa nioxoa ixomagateetedice inoatawece ane beyagi aneotema. <sup>9</sup>Leeditibige mele mabaatege ganioxoadipi anoyemaa me limedagadi gadigeladi, pida jinogotaganitibece nigina nigabaatege. <sup>10</sup>Aneotedogoji yajigotediogi gonioxoadipi lixaketedi ane daga diniciamico. Odaa inatawece leeditibige mele moibake lixakedi moyaxawa eledi oko. <sup>11</sup>Nigina oko ane lixakedi me datematika, leeditibige me yatemati Aneotedogoji latematiko. Nigina oko ane lixakedi me yaxawatiogi eledi oko, leeditibige me ibake nigina lixakedi Aneotedogoji ane yajigoteta me daxawanataka. Abakenitiwaji gadixaketedi Aneotedogoji ane yajigotedagawa mawii okanicodaagica, amaleegaga akaamitawecetiwaji ogeetetalo Aneotedogoji leegodi me gadexocitege Jesus Cristo. Inatawece oko leeditibige midioka limedi moiwenigide Aneotedogoji, Niginiwa anida loniciwaga midioka limedi me iige inoatawece. Odaa jigidaagee. Amém.

### **Anodaa leeditibige mejinaga nigina me jawikodeega leegodi nigina mejiwagataga Cristo**

<sup>12</sup>Yokaagetedipi yemaanigipi, jinaganawela leegodi gadawikodico ane dakake. Niginoa gadawikodico anetigadicinitiawaji agolalaga, akaaginoa. <sup>13</sup>Pida leeditibige maniniitibecetiawaji leegodi mawikodeetiawaji anodaageeteda Cristo me dawikode, amaleegaga eliodi maniniitibece nigica noko nige dopitedijo Cristo. Nigica noko inatawece oko onadi nigica nelegi nimawenegegi Cristo, codaa meliodi notoetiigi. <sup>14</sup>Yakadi maniniitibecetiawaji nigina nige etigadameni leegodi me iwitece Cristo, igaataga Liwigo Aneotedogoji ini makaamitagatiwaji, nigini Niwigo godaxawa me jiwenigidenaga Aneotedogoji. <sup>15</sup>Pida nigawikodee, jinigikani digica nigina akaamitiwaji ane dawikode leegodi me aijekegi, ogoa migetaga olicegegi, migetaga meo ane beyagi, migetaga itinege eletidi oko lewiga, igaataga nigida makaamitiwaji ayakadi mawiite niginoa ane beyagi ane godalagatalo. <sup>16</sup>Pida nigawikodee leegodi mida anenitege Cristo, jinaga aniboliki, pida ogeetetalo Aneotedogoji awiitibige moyowoogodi nigina eledi oko mida anenitege Cristo.

<sup>17</sup>Igaataga niginoa nokododi Aneotedogoji jigidaageyatedigi me iwi anigotediogi niginoa loenataka loiigi. Idigida nige oko odoejege me godiwi, odaa iwi anigotediogi, codaa eliodi me iloikatidi nigina oko

ane dogoyiwagadi nibodicetedi anele ane icogotedicogi miniwataga.

<sup>18</sup>Anodaagee me yalagata Aneotedogoji lotaga, nigijo mee,  
 “Nige dakaketigi me dibatetege Aneotedogoji nigina oko anele,  
 ajawienatakanaga me dagaxa me daga dibatetege nigina ane  
 dogoyiwagaditeda,  
 codaa anowo ane beyagi.”

<sup>19</sup>Odaa nigina oko ane nawikodeega leegodi Aneotedogoji ika me  
 nawikodeekawaanigi, pida nigidi oko leeditibige midioka limedi mowo  
 anele, codaa moyiwagadi Aneotedogoji me doweditedeloco, igaataga jegepaa  
 iliidagadi oko codaa idioka limedi meote me icotece niginoa ane lotaga.

### Nigicoa ane leeditibige me lakataga loiigi Aneotedogoji

**5** <sup>1</sup>Anakaamitiwaji laxokodipi ane niigenatakanaga miditaga anoyiwagadi  
 Goniotagodi. Ee eledi ee oxigodi ane diigenataka miditaga loiigi  
 Aneotedogoji. Codaa ee nakataganaga nigijoa lawikodico Cristo naga yeleo.  
 Odaa icota nigica noko Aneotedogoji nige godawanagaditetege Cristo  
 me godiwenigide lodoe nigina oko. <sup>2</sup>Enice eliodi me jipokotagawatiwaji,  
 akaami anakaami laxokodipi ane iigenatakani, madoweteloco lapo loiigi  
 Aneotedogoji, ane yajigotedagawa Aneotedogoji me gadowienigipi, micataga  
 nigina nowienogodi waxacocoli anele me doweditelogo codaa mele me  
 niodege lapo niwaxacocoli. Jinagadoweteloco daga leegodi me leeditibige  
 madoweteloco, pida leegodi memaani madoweteloco, anodaagee  
 Aneotedogoji me yemaa mawiitiwaji. Jinagadoweteloco dogoleetibige  
 manigaanyetece dinyeelo, pida leegodi mewa memaani madoweteloco  
 catiwedi gadaalegena. <sup>3</sup>Nigina madoweteloco nigidi loiigi Aneotedogoji ane  
 yajigotedagawa madoweteloco, odaa jinagawii liciagi nigina oko anoyemaa  
 me yelogotibigiwaji nigina me niigenatakanaga, pida awiitiwaji gadewiga me  
 niwinigijegi amaleegaga oyakadi loiigi Aneotedogoji modioteci, micoataga  
 niginoa waxacocoli modioteci nigina nowienogodi. <sup>4</sup>Odaa nigenagi Cristo, ane  
 liciagi nigina lacilo nowienogododi waxacocoli, odaa ja yajigotedagawatiwaji  
 nigica ganogeedi. Nigica ganogeedi liciagi nagana nale anidioka limedi me  
 datale, codaa meo nigina oko midioka limedi metigadiwenigidenitiwaji.

<sup>5</sup>Akaamitiwaji, lionekadipi, idagagaeni. Iwagatitiwaji niginoa  
 goneleegiwadi laxokodi ane niigenatakanaga. Codaa akaamitawecetiwaji  
 leeditibige me adinilionigatiti lodoe nigina eledi oko, codaa awii liciagi  
 nigina niotagipi me dinaxawatiwage. Igaataga Aneotedogoji lotaga mee,  
 “Aneotedogoji lakapetedipi nigina anagaxakenagaga,  
 pida eote aneletema nigina ane diniwikodetibece.”

<sup>6</sup>Enice adiniwikodenitibecetiwaji lodoe Aneotedogoji aneliodi nimawenegegi.  
 Odaa nigica noko ane nibikota, odaa ja gadiwenigidenitetiwaji. <sup>7</sup>Ikanitece  
 inoatawece aneo makaami agecagalodipi, codaa jinagalee agowikomataa,  
 leegodi Aneotedogoji doweditedagalocotiwaji.

<sup>8</sup>Ele midioka limedi madinajacagati, codaa adinowetitiwaji. Igaataga diaabo ane godaxakawa liciagi nigina nigediogo midiaanagadii, dokologoloke, doletibige okanicodaagica lakaloigo. Odaa jigidaagee godaxakawa doletibige me yaagadi okanicodaagica oko ane daga dinowedi. <sup>9</sup>Aatege godaxakawa, codaa adinoniciwagatitelo gatiwagatakanegegi. Igaataga owoogotitiwaji ganioxoadipi ane ilaagitelo nigina iigo nawikodeega anodaagenitiwaji mawikodee. <sup>10</sup>Pida nige ixomagatice mawikodeeawaanigi, odaa Aneotedogoji ja gadaxawani. Dagaxa meletedogodomi okotawece, codaa eniditedogowa me godexogotege Cristo, codaa icota midiokaanaga limedi me godiwenigide iniaa Cristo. Iniaaginiwa eote me digicata gaantokaagini gabeyacegitiwaji. Codaa eote me atitelocotiwaji gatiwagatakanegegi, codaa meote me gadoniciwati me iwitece Cristo. Eote me dagadiaa eyamagaticetiwaji gatiwagatakanegegi. <sup>11</sup>Jemaa minatawece oko midioka limedi modogetetalo, codaa Aneotedogoji me ibake epaa nimawenegegi me iige inatawece oko. Odaa jigidaagee. Amém.

#### Owidijedi lotaga Pedro

<sup>12</sup>Silas idaxawa me jidi nagadi iwakatetibigajitiwaji. Jakadi nigini gonioxa me yakadi me jinakatonaga. Jidikotibigajitiwaji me gadoniciwagati, codaa me jelogoditagawatiwaji me jidi mewi Aneotedogoji meletedogodomi. Odaa jigiwagatitiwaji, codaa agawienatakani me dagaxa meletedogodomi.

<sup>13</sup>Nigina lapo loiigi Aneotedogoji digoina manitaga nigotaga anejalagatigi me “Babilônia” oyecoaditibigajitiwaji. Aneotedogoji iolatedicoace anigotedogowa magaga godiolatedice. Marcos aagaga yecoaditibigajitiwaji, Marcos idejigo micataga daga ionigi. <sup>14</sup>Nigina madinicenitiwaji, adinibedoni me ikeenitiwaji mewi memaanitiwajieledi ganioxoadipi.

Jemaa Aneotedogoji meote mele gadaalegenali, akaamitawece anida anenitege Cristo.